

28/07/2024

Aizawl

1830 Hrs

REGIONAL NEWS

HEADLINES:-

1. Chief Minister Pu Lalduhoma'n Mizoram, a mamawh hmasa chu inkalpawhna kawng tha zawk leh tam zawk neih a ni, a ti.
2. Mizoram leh Assam sorkar aiawhte August ni 9 hian ramri buai chinfel tumin Aizawl-ah inbiak chhonzawm an tum.
3. Prime Minister Narendra Modi-a'n UNESCO-in Assam-a Charaideo Maidam, World Heritage Site zinga a telh chu a chhuanawm tak zet a ni, a ti.
4. Paris Olympics neih mekah India tan Manu Bhaker-in 10m Air Pistol inkah siakah Bronze medal a la.

<><><>

CM@NITI AYO

Chief Minister Pu Lalduhoma tuna Mizoramin a mamawh hmasa chu inkalpawhna kawng tha zawk leh tam zawk neih a ni, a ti.

Nimina NITI Aayog Governing Council thutkhawm vawi 9-na Prime Minister Narendra Modi kaihhruaina a New Delhi a buatsaihah he thu hi sawiin Pu Lalduhoma chuan tun dinhmunah Mizoram chhunga kawng awm zat chu rampum huap dinhmun ngaihtuahin a la tlem hle a ni a ti a. Viksit Bharat 2047 Mizorama a hlawhtlin theihna tur thil pawimawh hrang hrang a thlen nghal baw. Chief Minister chuan, NITI Aayog in State Institution for Transformation of Mizoram atana tanpuina a pek avangin lawmthu a sawi a. Finance Commission 16-na hnena Mizoram mamawh zual pui an thehluh te chu Viksit Bharat 2047 a hlawhtlin theih na'na thil pawimawh tak tak te an ni, a ti a ,zirna, hriselna, tui, kawlphehtha siamchhuah, faina leh inrelbawlina rotling tur lian tham din kawnga indaih lohna pawh a la nasa niin a sawi a. Mizoram mipui zatve aia tam khawpuia cheng an ni a, khawpui fel fai leh leilung chhiatna laka him, state hmasawna bulthut (growth centre) ni thei neih Mizoramin a mamawh a ni a ti a. Khawpui leh thingtlang mipuite lakluh inthlau lutuk tihbo na'n te, hna thar tam zawk siam a nih theih na'n te Handholding Policy,a sorkar chuan a kalpui dawn thu a sawi a. Hemi atan hian central sawrkar hian a bika tanpuina (special package)-in Mizoram tanpui pui se an duh hle a ni a ti.

Mizoram chuan state dangte aiin hmasawna a kalpui tlai bik a tih pawh sawiin a awmna a kil khawr avangin nitin khawsak senso leh hmasawna hnathawhna senso pawh a sang bik a ni a ti a. Heti chung hian midangte hnunga kal reng ringawt erawh an tum hauh lo tih sawiin Sustainable Development Goals tihhlawhtlinna lama Mizoram kal chak dan hian state dangte umpha tura sorkar leh mipuite tumruhia a tilang a ni, a ti.

India hmarchhak state te hian leilung awmdan vang te, hmasawna ruhrel lama an la hniam vang tein Industry lian a tlem a, sum hnar an tlachham bik niin a sawi a. A bika hmarchhak state-te'n harsatna an lo hmachhawna tur; zalen zawka hman theih tur sum leh pai awm thei se, an tangkaipui hle ang, a ti a. Ministry tinin an sum ruahman atanga za zela 10 hmarchhak state-te tana an ruahman dan chu inkaihruaina mumal tak duan ni se, sorkar laipui hnuiaia company-te pawhin an

Corporate Social Responsibility (CSR) sum za zela 10 vel tal hmarchhak state ah hmang thei se, tiin a rawtna a thlen bawk .

chuan, Viksit Bharat tihlawhtling turin remna leh muanna neih a tul hmasa,tih sawiin Mizoram chu ramdang pahnih karcheh leh a thenawm rama harsatna thleng te vanga chim buai reng a ni a. Venhimna lam (security related expenditure) hmang a sum pek ve chiah lo a nih pawhin central sawrkar chuan 'Peace dividend' tal Mizoram tan ngaihtuhsak se a duh thu a sawi bawk a ni.

<><><>

RICE FOR IDPS

Ministry of Home Affairs-in Manipur a chi leh chi intihbuaina avanga Mizorama sahimna zawnga lokalte tana buhfai pek tura a tih chu buaipui mek a ni.

Home Secretary Pu Vanlalmawia'n a sawi danin an sahimna zawnga Mizorama raltlan awm zawng zawng tanpuina tur sorkar laipui-ah dil a nih lai-in tuna cheng vaibelchhe 5 man hu buhfai a tanpuina tur ruahman chu Manipur atanga rawn raltlante tan bika Ministry of Home Affairs-in a rawn ruahman a ni a. Ministry of Food and Public Distribution hnenah cheng vaibelchhe 5 man buhfai pek tura ruahman turin a ti a, hei hi a hranpa a pawisa sanction ngai lova an ngaih thu home secretary chuan sawiin , hemi atan hian Food, Civil Supplies and Consumer Affairs department hotute nena buaipui chhonzawm tur a ni, a ti a. A pawisa fai ni lo, a buhfai ang zawnga lokal tur a nih avangin a phurh dan tur leh thil dang buaipui a ruahmanna siam a ngai dawn niin a sawi bawk a ni. Tun hnai a Union Home Minister Amit Shah-a'n Chief Minister Pu Lalduhoma hnena raltlante tanpuina rawn pek a nih tur thu a sawi zulzui-in Ministry of Home Affairs a Under Secretary Prem Parkash chuan July ni 18 khan office memorandum tichhuakin Union Secretary, Food & Public Distribution hnenah buhfai cheng vaibelchhe 5 man pe chhuak turin hriattirna a tichhuak a. A copy hi Mizoram Chief Secretary pawh a rawn thawn a ni. Puan tawn thin angin nikum May ni 3-a Manipur a chi leh chi intihbuaina avanga Mizoram a rawn tlanchhiate tanpuina atan sorkar hmasa khan sorkar laipui-ah sum a dil thin a. Nikum May ni 16 khan khatih lai a Chief Minister Pu Zoramthanga khan cheng vaibelchhe 5 a dil a, raltlan an pun chak tak em avangin May ni 23 khan cheng vaibelchhe 10 a dil leh a. Sorkar laipui a ngawih hnu-ah tunah hian buhfai ang zawnga pe turin ruahmanna siam a ni ta a ni.

<><><>

BORDER TALKS

Ramri buaina chingfel tura beihna kal zelah Mizoram leh Assam sorkar aiawhte chuan ,thlathar August ni 9 hian Aizawl-ah inbiak chhonzawm an tum.

Home minister Pu K. Sapdanga'n Akashvani Aizawl a hrilh danin Assam sorkar hian Mizoram sorkar a rawn be pawp a, state pahnih aiawhte remchan hun dapin ruahmanna siam a ni a. Assam sorkar palaite hi an Border Prtotection and Development Minister Atul Bora-a'n a rawn ho

ang a, an state home secretary bakah home department leh a kaihnhawih official dangte lokal tura ngaih a ni a. Pu K. Sapdanga hi home secretary Pu Vanlalmawia leh official dangte'n an tawiawm ang. Home department hotute'n an sawi danin nikum tawp lam khan Assam palaite hian inbiakna chhonzawm tura Aizawl lokal an tum a, amaherawhchu, Mizoram assembly inthlan a hnaih tawh em avangin lokal rih lo tura thurawn pek an ni a. Inthlan hnu kumin February ni 9 khan chief minister thar Pu Lalduhoma leh Assam chief minister Himanta Biswa Sarma te chu Guwahati-ah inhmu-in Assam chief minister hian a aiawh minister rawn tirh thuai a tum thu a sawi na-in Parliament inthlanpui-in a nang chho leh ta si a, inbiak hun hi sawn hlat a ngai leh ta niin home department hotute chuan an sawi a ni.

Tun tumah hian an inbiak chuan state pahnih minister te inbiak vawi 4-na tur a ni dawn a. A hma lam hian Aizawlah vawi 2 an inbe tawh a, kum 2022 November thla khan Guwahati khawpui-ah an inbe leh a. Khami tuma an inbiakna a an remtih tlan angin Mizoram sorkar chuan Mizoram chin ni a a pawm khaw 62 hming te a thehluh a. Hei hi ngun taka a hmun ngei a zirchian hnu a thehluh a ni. Tun tum inbiakna-ah hian hei hi sawi a nih rin a ni bawk.

Assam leh Mizoram ramri buai hi kum 1972-a Mizoram UT-a hlankai a nih tan, a taka a hmun ngei a ramri rin lova North-East Areas Reorganisation Act, 1971-in a sawi dan ringawta ramsi a siam avanga lo intan a ni a. Ramri hmun hrang hrangah buaina leh tharum thawhna thleng fo mah se, July ni 26, 2021 a Vairengte dai-a Mizoram leh Assam Police an inkah ang em kha a la thleng ngai lo. Khami atang khan state inthenawm pahnihte chuan ramri chingfel turin ngawrh zawkin inbiakna an buatsaih chho ta a. Official-te vawi tam tak an inbiak bakah minister-te an inbe tawh a. Chief Minister hlui Pu Zoramthanga leh Assam CM Himanta Biswa Sarma te pawh kha vawi 2 Delhi-a an inbiak bakah Chief Minister thar Pu Lalduhoma leh Assam CM te hi an lo inbe tawh bawk a ni.

<><><>

MOU

Myanmar Chin state a Myanmar sipai sorkarna paihthlak tuma din Chin pawl 2-te inkara harsatna chingfel turin nimin khan Aizawlah pawl pahnih aiawhte an inbia.

Zo Reunification Organisation (ZoRO) ruahmanna hnuaiah hian Chin state a Myanmar sipai dotu Chin National Front (CNF) hruaitute leh Zomi Reunification Organisation (ZRO) hruaitute hi an inbia a. Thawhhona thuthlung ziakin Zofate(Chin-Kuki-Zomi/Mizo) chu thlahtu thuhmun, tawng khat hmang (Same language - different dialect), nunphung thuhmun, serh leh sang inkhawih pawlh, beiseina thuhmun vuana dam leh tlang khatah, thih leh ruam khatah ti thin unau an nih thu an tarlang a. Ram leh hnam tana hma an lakna kawngah an thahnemngaih luat avanga unau an inhmu thiam lo chu pawl an tih thu leh tun hnuah thleng tawh lo se an duh thu sawiin inremna tluantling a awm theih nan a tul dan a zira inbiakna neih leh nise an ti bawk a ni.

Thawhhona Thuthlungah hian ZRO Team leader Pu K.C. Smack leh CNF aiawhin an Vice chairman number one Pu Thang Ning Kee te'n hming

an ziaak a. ZoRO aiawhin an president Pu R. Sangkawia leh general secretary Pu L. Ramdinliana Renthlei te'n an hming an ziaak bawk a ni.

<><><>

MANN KI BAAT

Prime Minister Narendra Modi-a'n UNESCO-in Assam-a Charaideo Maidam, World Heritage Site zinga a telh chu a chhuanawm tak zet tih sawiin hei hi India rama hmun hlui humhalh tur 43-na, hmarchhak biala hmasa ber a ni, a ti.

Vawiin Akashvani-a Mann Ki Baat hun a hmanna-ah he thu hi a sawi a, hmun pawimawh anih chhan tarlangin Charaideo chu Ahom lal ram khawpui hmasa ber a ni, a ti a, an thlahtute hriatrengna leh thil hlute an dah thatna hmun a ni, a ti.

Thla leh ni 7-a National Handloom Day hman tur chungchang pawh sawiin Prime Minister chuan ramchhung hmun hrang hranga tualtah puan lar chho zel chu a lawmawm tak zet a ni, a ti a, mipuite chu handloom atanga an thil siam chhuah chi hrang hrangte, social media, My Product My Pride tih hnuaiah pho lang turin a sawm a ni.

Ruihhlo chungchang pawh sawiin Pu Modi-a chuan an fa-ten ruihhlo an ngai ve ang tih chu chhungkaw tin hlauhthawn a ni, a ti a, ruihhlo ngaite tanpuina turin sorkarin tun hnai khan MANAS a din thu sawiin mamawhtute tan helpline No.1933-ah a thlawnin engtik lai pawhin biak theih a ni, a ti a, ruihhlo kaihhnawih thil engemaw hriate pawhin he No. atang vek hian Narcotics Control Bureau-ah a thlen thei a ni, a ti bawk.

<><><>

PARIS OLYMPICS

Paris Olympics neih mekah vawiin khan India hmeichhia, Manu Bhaker-in 10m Air Pistol inkah siakah 3-na niin Bronze medal a la a, India hmeichhia, silai kah a medal la thei hmasa ber a nih bakah Paris Olympics-a India-in medal a lak hmasak ber a ni.

Table tennis hmeichhe singles-ah Sreeja Akula-in Sweden mi hnehin round of 64 a paltlang a ni.

<><><>